

# ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՔՈՒԷՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ  
P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: [prelacy@armenianprelacykw.org](mailto:prelacy@armenianprelacykw.org)

ՆՈՐ ՇՐՋԱՆ, Է. Տարի, Թիւ 275, Ուրբաթ, 20 ՄԱՐՏ, 2015

ՀԱՄԱՅՆՔԱՅԻՆ



ԱՌԱՋՆՈՐԴԱՐԱՆ ՀԱՅՈՑ  
ՔՈՒԷՅԹԻ ԹԵՄԻՆ

P.O.BOX 8157, Salmiyeh 22052 – KUWAIT – Tel:25614392, e-mail: [prelacy@armenianprelacykw.org](mailto:prelacy@armenianprelacykw.org)

## Հաղորդագրութիւն

Միբելի Քուէթահայեր,

Սոյն հաղորդագրութեամբ ուրախութեամբ տեղեակ կը պահենք ձեզ, որ Երեքշաբթի 24 Մարտ 2015-ին, Թեմիս երեսփոխանական ժողովը պիտի գումարէ իր Ա. Արտակարգ Ժողովը, որու օրակարգին գլխաւոր կէտն է՝ Քուէթի և Շրջակայից Թեմի առաջնորդի ընտրութիւնը՝ ըստ Թեմիս գործող կանոնագրի թիւ 68 յօդուածի Գ. կէտին: Արդէն այս առնչութեամբ ստացած ենք Ն.Ս.Օ.Տ.Տ. Արամ Ա. Կաթողիկոսէն թեկնածուներու եռանուն ցանկը:

Վստահաբար սոյն օրը պատմական իրադարձութիւն պիտի ըլլայ մեր Թեմի տարեգրութեան մէջ, նկատի ունենալով, որ Թեմս երկար տարիներէ օժտուած եղած է Կաթողիկոսական Փոխանորդներով:

Այսօր, որպէս առանձին Թեմ կանգնած ենք նոր մարտահրաւերներու սեմին, որոնցմէ ամենագլխաւորն է եկեղեցապատկան կալուածի մը ձեռքբերումը: Այս հանգրուանին, որեւէ աստենէ աւելի անհրաժեշտութիւնը ունինք մեր կողքին, մեր բեռին բաժնեկից, մեր դատին անխոնջ պաշտպան, մեր ցաւերուն կարեկից, արի ու նուիրեալ առաջնորդի մը իմաստուն ղեկավարութեան:


Ընտրութեան արդիւնքը օրին պիտի յղուի Մեծի Տանն Կիլիկիոյ Գահակալ՝ Ն.Ս.Օ.Տ.Տ. Արամ Ա. Վեհափառ հայրապետին, առ ի վաւերացում, ինչպէս նաև պիտի ծանուցուի Թեմիս ժողովուրդին, յաջորդ օրը, յատուկ հաղորդագրութեամբ:

Դիւան Երեսփոխանական ժողովի

Քուէթ, 18 Մարտ 2015

## ՔՆՆԱՐԿՈՒՄ ՀԱՅՈՑ ՑԵՂԱՍՊԱՆՈՒԹԵԱՆ 100-րդ ՏԱՐԵԼԻՑԻ ՀԱՄԱՅՆԱԿԱԿԱՆ ՀՈՉԱԿԱԳՐԻՆ ՇՈՒՐՋ

Չորեքշաբթի, 18 Մարտ 2015-ին, երեկոյեան ժամը 8:30-ին, Սրբոց Վարդանանց եկեղեցւոյ մէջ տեղի ունեցաւ քննարկման երեկոյ՝ պահանջատիրութեան եւ Հայոց ցեղասպանութեան 100-րդ տարելիցի համահայկական հռչակագրին շուրջ, Հովանատրութեամբ Գերպ. Տ. Մասիս Ծ. Վրդ. Զօպոյեանի, կազմակերպութեամբ՝ Քուէրթի Հայ Դատի Յանձնախումբին, զեկուցաբեր ունենալով՝ Բժ. Ժան Պէպէճեան:



Առաջին հերթին, յանձնախումբի ատենապետ՝ Պրն. Տիգրան Պայաթեան ամփոփ ձեւով ներկայացուց հայ ժողովուրդի կորուստները եւ պահանջները, որմէ ետք խօսքը փոխանցեց բժ. Ժան Պէպէճեանին: Վերջինս մանրամասնօրէն զեկուցեց նորամշակ հռչակագրի մասին:

Ան անդրադարձաւ հռչակագրի նախ՝ իմաստին, նպատակին «Հայաստանը պաշտպանն է աշխարհի բոլոր հայերուն՝ Հայաստանի, Լեռնային Ղարաբաղի Հանրապետութեան եւ սփիւռքի» գաղափարին, ետքը՝ բովանդակութեան, նկատի ունենալով հիմնաւորումներն



ու որոշումները, մասնաւորապէս կեդրոնանալով քանի մը կէտերու վրայ: Նշուեցաւ նաեւ թէ հռչակագիրը, իր 5-րդ եւ վերջին տարբերակով կրցաւ համախմբել համայն հայութիւնը՝ Հայաստանի եւ Արցախի հանրապետութիւններով եւ սփիւռքով. Նաեւ հաստատեց, որ հռչակագիրը հայ ժողովուրդի դարաւոր պատմութեան մէջ աննախընթաց դէպք մը կը համարուի:

Յետ զեկոյցին, քանի մը լուսաբանական հարցերու առիթ տրուեցաւ:

Քննարկման աւարտին, խօսք առաւ Գերապատիւ Հայր Սուրբը ու փոխանցեց թէ՛ նման հաւաքներն ու քննարկման երեկոները կարելոր տեղ պէտք է գրաւեն ամէն հայ երիտասարդի կեանքին մէջ, նաեւ շեշտեց աշխարհի բոլոր հայերուն միասնակամութիւնը այս անկիւնադարձային տարուան սեմին:

Ռիթա Տէկիրմէնճեան

## **Ն.Ս.Տ.Տ. ՖՐԱՆՉԻՍԿՈՍ ՊԱՊԻ ԸՆՏՐՈԹԵԱՆ ԵՐԿՐՈՐԴ ՏԱՐԵԴԱՐՁԻ ՆՇՈՒՄ**

Չորեքշաբթի, 11 Մարտի երեկոյեան, Թեմիս Կաթողիկոսական Փոխանորդ Գերպ. Տ. Մասիս Ծ. Կրդ. Զօպուեան, ընկերակցութեամբ գաղութիս Հոգեւոր Հովիւ Արժ. Տ. Արտակ Քինյ. Քէհեաեանի, մասնակցեցաւ Հռոմի Ֆրանչիսկոս Պապի ընտրութեան եւ գահակալութեան երկրորդ տարեդարձի յատուկ ընդունելութեան, որ կազմակերպուած էր Քուէյթի մօտ Վատիկանի Դեսպանատան կողմէ: Հայր Սուրբը յանուն Մեծի Տանն Կիլիկիոյ Գահակալ՝



Ն.Ս.Տ.Տ. Արամ Ա. Կաթողիկոսին, Թեմիս ժողովականութեան ու ժողովուրդին շնորհատրեց Քուէյթի մօտ Վատիկանի Դեսպան՝ Փիթըր Եպս. Ռայդշը եւ երկար գահակալութիւն մաղթեց Պապին:

## ՀԱՅԿԱԿԱՆ

# «Մենք Թշնամութիւն Եւ Ատելութիւն Չենք Սերմաներ Մեր Ժողովուրդին Մէջ» Ըսաւ Նախագահ Սարգսեան

«Հայաստանի Հանրապետութիւնը նաեւ միջազգային կազմակերպութիւններուն մէջ պիտի շարունակէ իր պայքարը ընդդէմ ցեղասպանութեան յանցագործութեան», յայտարարած է Հայաստանի նախագահ Սերժ Սարգսեան Չորեքշաբթի օր՝ «Արարատի ստորոտին» խորագիրով միջազգային լրատու-համաժողովին:

«Մենք կը ցանկայինք Հայոց ցեղասպանութեան 100-րդ տարելիցը ոգեկոչել նաեւ թուրք ժողովուրդին հետ՝ անով իսկ ազդարարելով երկու ժողովուրդներուն միջեւ հաշտեցման եւ յարաբերութիւններու հաստատման նոր հանգրուան մը, որուն ալ միտուած էին 2009 թուականին Հայաստանի եւ Թուրքիոյ միջեւ ստորագրուած արձանագրութիւնները եւ իմ հրաւերս Թուրքիոյ նախագահ Էրտողանին՝ 24 Ապրիլին միասին յարգելու Հայոց եղեռնի զոհերու յիշատակը: Դժբախտաբար, այս անգամ ալ մենք բախեցանք ժխտողականութեան հետ, որ այս տարի առանձնայատուկ դրսեւորում ստացաւ», իր ելոյթին մէջ ըսաւ նախագահ Սարգսեան:

Ան անդրադարձաւ Հայոց ցեղասպանութեան յիշատակի ոգեկոչման օրը՝ 24 Ապրիլին Թուրքիոյ մէջ Կալիփոլիի մարտերու 100-ամեակը նշելու որոշման: Ըստ նախագահին, թրքական իշխանութիւնները իրենց ժխտողական քաղաքականութեամբ ոչ միայն կ'արդարացնեն Օսմանեան իշխանութիւններուն ոճիրը՝ հայերու հայրենագրկումը, այլեւ վտանգաւոր նախադէպ կը ստեղծեն նոր ցեղասպանութիւններու իրագործման համար:

«Մարտ 2013-ին ՄԱԿ-ի մարդկային իրաւունքներու խորհուրդի 22-րդ նստաշրջանին ընդունուեցաւ Հայաստանի նախաձեռնած՝ ցեղասպանութեան կանխարգիլման վերաբերեալ բանաձեւը: Այս տարի եւս պիտի առաջարկենք նոր բանաձեւի նախագիծ: Ոգեւորիչ է, որ միջազգային հանրութեան ներկայացուցիչները եւս անմասն չեն Հայաստանի նախաձեռնութիւններուն, աւելին՝ իրենց ծանրակշիռ ներդրումը կը բերեն Հայոց ցեղասպանութեան ճանաչման եւ դատապարտման գործին մէջ»:

«Եթէ Ազրպէյճան չըլլար, հայ-թրքական արձանագրութիւնները արդէն վաւերացուած կ'ըլլային», յայտարարած է Հայաստանի նախագահ Սերժ Սարգսեան՝ համաժողովի ծիրին մէջ պատասխանելով թրքական «Զաման» թերթի լրագրողին հարցումին:

Նախագահը ըսած է. «Թուրքիոյ դեկավարութեան վրայ մնայուն կերպով ճնշում կը բանեցնէ Ազրպէյճանի գործօնը: Քանի մը տարի առաջ Իլիւս Ալիւ յայտարարած էր Հայաստանը մեկուսացնելու քաղաքականութեան մասին: Բնականաբար, այդ ծրագիրներուն իրականացման համար ան հսկայական ջանքեր կը գործադրէ, եւ այդ քաղաքականութեան հետեւանքները որոշակիօրէն կը տեսնենք Թուրքիոյ մէջ: Հայ-թրքական արձանագրութիւնները ետ կանչելով եւ չեմ սպաննած զանոնք եւ չեմ փակած հաշտութեան պատուհանը: Ատիկա ոչ թէ իրաւական, այլ քաղաքական քայլ է: Այս քայլով եւս փափաքած եմ անգամ մը եւս Թուրքիոյ իշխանութիւններուն ուշադրութիւնը հրաւիրել այս փաստին վրայ»:

Անդրադառնալով արտաքին քաղաքականութեան՝ նախագահ Սերժ Սարգսեան նշեց, որ Ռուսիոյ հետ սերտ փոխադարձ համագործակցութիւնը Հայաստանի անվտանգութեան, տնտեսական զարգացման եւ կայունութեան կարեւոր բաղադրիչներէն մէկն է:

Հանրապետության նախագահը շեշտեց, որ Հայաստանի արտաքին քաղաքականությունը ուղղուած է նաեւ Միացեալ Նահանգներու հետ բարեկամական գործընկերութեան եւ Ֆրանսայի հետ առանձնաշնորհեալ յարաբերութիւններու ամրապնդման: Ան աւելցուց, որ Հայաստանի անկախութենէն ի վեր հայ-ամերիկեան յարաբերութիւնները միշտ զարգացում կ'արձանագրեն:

## **Հան Տեսակցեցաւ Սարգսեանի, Նալբանդեանի Եւ Աբրահամեան Հետ**

Հայաստանի նախագահ Սերժ Սարգսեան Չորեքշաբթի օր ընդունած է Եւրոպական դրացնութեան քաղաքականութեան եւ ընդարձակման բանակցութիւններու հարցերով յանձնակատար Եոհաննէս Հանը:

Հանրապետության նախագահը եւրոպացի գործընկերներուն հետ շարունակական երկխօսութիւնը եւ բարձրաստիճան փոխադարձ այցելութիւնները լաւ կարելիութիւն նկատած է Հայաստան-Եւրոպական Միութիւն յարաբերութիւններու զարգացման հեռանկարները քննարկելու, երկուստեք հետաքրքրող հարցերու շուրջ միտքեր փոխանակելու համար: Այս ծիրին մէջ նախագահ Սերժ Սարգսեան ողջունած է յանձնակատար Եոհաննէս Հանի այցելութիւնը Հայաստան:

Հան իր կարգին ընդգծած է, որ մեծապէս կը գնահատէ Հայաստանի եւ եւրոպացի գործընկերներուն միջեւ ընթացող երկխօսութիւնն ու համագործակցութիւնը: Ան նշած է, որ այժմ վերատեսութեան կ'ենթարկուի Եւրոպական դրացնութեան քաղաքականութեան հայեցակարգը, որուն սկզբունքներուն շուրջ տեսակէտներու աշխուժ փոխանակում կ'իրականացուի: Այդպիսի կարեւոր սկզբունքներէն մէկը, ըստ յանձնակատար Հանի, այն է, որ դրացնութեան քաղաքականութեան իւրաքանչիւր գործընկերոջ հետ Եւրոպական Միութիւնը պէտք է ունենայ անհատական մօտեցում՝ հասկնալով եւ յարգելով համագործակցութեան վերաբերեալ տուեալ երկրին պատկերացումներն ու մօտեցումները:

Նախագահ Սերժ Սարգսեան Եւրոպական դրացնութեան քաղաքականութեան ծիրին մէջ համագործակցութիւնը օգտակար նկատած է Հայաստանի մէջ բարեփոխումներու խթանման տեսանկիւնէն եւ շնորհակալութիւն յայտնած եւրոպական բոլոր կառոյցներուն՝ այս հարցին մէջ ցարդ Հայաստանին ցուցաբերուած օժանդակութեան համար:

Հան նշած է, թէ Եւրոպական Միութիւնը արեւելեան գործընկերութեան ծիրին մէջ նախորդ հանգրուանի բանակցութիւնները վատնուած ջանքեր չէին, եւ անկախ հետագայ զարգացումներէն, անոնք օգտակար էին ակնկալութիւններն ու սահմանուած չափանիշները, նաեւ եւրոպական շուկային մէջ մրցունակ ըլլալու կարելիութիւնները պատկերացնելու առումով:

Հանդիպումին ընթացքին նախագահ Սերժ Սարգսեան եւ յանձնակատար Եոհաննէս Հան միտքեր փոխանակած են նաեւ շրջանային խնդիրներու եւ մարտահրաւերներու, Լեռնային Ղարաբաղի տագնապի խաղաղ լուծման հոլովոյթի վերջին զարգացումներուն շուրջ:

Եւրոպական դրացնութեան քաղաքականութեան եւ ընդարձակման բանակցութիւններու հարցերով յանձնակատար Եոհաննէս Հան Չորեքշաբթի օր նաեւ տեսակցած է Հայաստանի արտաքին գործոց նախարար Էդուարդ Նալբանդեանի հետ:

Հանդիպումեն ետք տրուած մամլոյ միացեալ ասուլիսին ընթացքին, Հան խօսելով Լեռնային Ղարաբաղի տագնապի լուծման հոլովոյթին մասին, ըսած է. «Եւրոպական Միութիւնը կ'աջակցի Լեռնային Ղարաբաղի տագնապին լուծումով զբաղող ԵԱՀԿ-ի Մինսքի խմբակի ձեւաչափին: Մթաթիւս քոն անընդունելի է, իսկ բանակցութիւններու նպատակը խաղաղ լուծման հասնիլն է: Եւրոպական Միութիւնը կը խթանէ Հայաստանի եւ Ազրայէճանի միջեւ երկխօսութեան շարունակումը, մանաւանդ նախագահներու մակարդակով: Կոչ կ'ուղղենք կողմերուն՝ յարգելու զինադադարը, զսպուածութիւն դրսեւորելու թէ՛ յայտարարութիւններուն եւ թէ՛ գործողութիւններուն մէջ՝ ստեղծելով տագնապի լուծման համար բարենպաստ մթնոլորտ»:

Հայաստանի արտաքին գործոց նախարար Էդուարդ Նալբանդեան պատասխանելով հարցումին, թէ ինչպէ՞ս կը մեկնաբանէ Թուրքիոյ արտաքին գործոց նախարարին յայտարարութիւնը, թէ Հայաստան ոչինչ կ'ընէ դարաբաղեան տագնապի լուծման ուղղութեամբ, ըսած է. «Ղարաբաղեան տագնապի լուծման հարցին մէջ Թուրքիա միշտ խնդիր ստեղծած է՝ մէկ կողմէ աջակցելով Ազրայէճանի ապակառուցողական մօտեցման, միւս կողմէ՝ փորձելով միջամտել միջազգային լիազօրութիւն ունեցող եռանախագահներու ջանքերուն: Եթէ Թուրքիա իսկապէս կը փափաքի օգնել հիմնախնդիրի լուծման, որքան կարելի է պետք է հեռու մնայ այդ հոլովոյթէն»:

Նալբանդեան ըսած է. «Պէտք է զերծ մնալ այնպիսի քայլերէ, որոնք կրնան վնասել եռանախագահներու ջանքերուն՝ ուղղուած հիմնախնդիրի խաղաղ լուծման, զերծ մնալ ստեղծելէ նոր կառոյց, ձեւաչափ, աշխատանքային խումբ, որոնք կը վնասեն եռանախագահներու գործունէութեան: Եռանախագահները կ'ընեն կարելի ամէն բան, որպէսզի հիմնախնդիրը ունենայ բացառապէս խաղաղ լուծում»:

Եւրոպական դրացնութեան քաղաքականութեան եւ ընդարձակման բանակցութիւններու հարցերով յանձնակատարը ապա տեսակցած է վարչապետ Յովիկ Աբրահամեանի հետ: Հանդիպման ընթացքին Աբրահամեան ըսած է, որ Հայաստան պատրաստակամ է խթանելու Եւրոպական Միութեան հետ գործակցութիւնը բարեփոխումներու շարունակականութեան ապահովման, առեւտրական-տնտեսական կապերու ընդլայնման, գործարար միջավայրի բարելւման, արդիւնաւէտ կառավարման, ժողովրդավարութեան, մարդկային իրաւունքներու եւ այլ մարզերու մէջ:

Հան շեշտած է, որ Եւրոպական Միութիւնը շահագրգռուած է Հայաստանի հետ յարաբերութիւններու խորացման, ամրապնդման գործին մէջ եւ յոյս յայտնած, որ իր այցելութիւնը նոր լիցք կը հաղորդէ երկկողմանի գործակցութեան:

Զրուցակիցները միտքեր փոխանակած են Հայաստան-Եւրոպական Միութիւն յարաբերութիւններու նոր օրակարգի ձեւաւորման ուղղութեամբ տարուող աշխատանքներուն, ուժանիւթի, գիւղատնտեսութեան, ենթակառոցներու, օդանաւային ճամբորդութեան մարզերուն մէջ փոխադարձ գործակցութեան զարգացման, Եւրոպական Միութեան այցեգիրի ազատականացման կարելիութիւններուն վերաբերեալ:

## **Ըստ Թրքական Լրատուամիջոցներու. Էրտողան Եւ Փութին Խօսած Են «1915-Ի Դէպքերուն Մասին»**

Թուրքիոյ եւ Ռուսիոյ նախագահներ Ռեճեփ Թայիփ Էրտողան եւ Վլատիմիր Փութին երեքշաբթի օր հեռաձայնային հաղորդակցութիւն մը ունեցած են:

«Անատոլու» կը հաղորդէ, որ հաղորդակցութիւնը տեւած է 30 վայրկեան: Նախագահները քննարկած են Ռուսիոյ եւ Թուրքիոյ յարաբերութիւնները զարգացնելու անհրաժեշտութիւնը, Ուքրանիոյ ճգնաժամի եւ Խրիմի թաթարներու խնդիրի լուծման ուղիներ գտնելու հարցը:

Էրտողան յիշեցուցած է, որ 20 Մարտին պիտի այցելէ Ուքրանիա: Կարճ անդրադարձ կատարուած է նաեւ «1915-ի դէպքերուն»: Էրտողան ըսած է, որ այդ առումով Թուրքիա կողմ է արդար յիշողութեան հեռանկարին, սակայն Հայաստանը խաղաղութեան կոչերը կ'անտեսէ եւ պատմաբաններու յանձնախումբ ստեղծելու առաջարկներուն դրական մօտեցում չի ցուցաբերեր:

Նախապէս Քրեմլինի մամլոյ ծառայութենէն յայտնած էին, որ Ռուսիոյ եւ Թուրքիոյ նախագահները քննարկած են միացեալ ուժանիւթային նախագիծերու իրականացումը, ներառեալ՝ «Թրքական հոսքը»:

## **ՀՅԴ-ն Հանդիպում Ունեցած Է Եւրոպական Միութեան Յանձնակատարին Հետ**

Հայաստանի մէջ Եւրոպական Միութեան պատուիրակութեան գրասենեակին մէջ ՀՅԴ Հայաստանի Գերագոյն մարմինի ներկայացուցիչ նշանակուած Ադուան Վարդանեան եւ անդամ Լիլիթ Գալստեան հանդիպեցան Եւրոպական Միութեան ընդլայնման եւ դրացնութեան քաղաքականութեան հարցերով նոր նշանակուած յանձնակատար Եոհաննես Հանին հետ:

Յանձնակատարը ողջունելով հիւրերը, ցանկութիւն յայտնեց լսել անոնց տեսակէտներն ու մօտեցումները երկրի ներքաղաքական կացութեան, եւրոպական դրացնութեան ձեւաչափին մէջ անոնց ակնկալիքներուն ու պատկերացումներուն ուղղութեամբ: Գոհունակութիւն յայտնելով հանդիպման կարելիութեան համար, ՀՅԴ Հայաստանի Գերագոյն մարմինի ներկայացուցիչ Ադուան Վարդանեան համառօտ ներկայացուց կուսակցութեան քաղաքական օրակարգի տուեալ պահու հիմնական առաջնահերթութիւններէն երկուքը՝ շեշտը դնելով սահմանադրական բարեփոխումներու ՀՅԴ-ի մօտեցումներուն, ինչպէս նաեւ ընկերային-տնտեսական քաղաքականութեան առնչութեամբ կուսակցութեան սկզբունքային դիրքորոշումներուն վրայ: Ադուան Վարդանեան կարեւոր նկատեց նաեւ Եւրոպական Միութեան դերակատարութիւնը ու աջակցութիւնը եւրոպական չափանիշներով ընտրական օրէնսգիրքի մշակման եւ համապատասխանաբար՝ ընտրութիւններու կազմակերպման գործին մէջ: Վարդանեան նաեւ լուստեսութիւն յայտնեց Ռիկայի վեհաժողովին մէջ քաղաքական օրակարգով նոր մակարդակի բանակցութիւններ սկսելու ուղղութեամբ:

Լիլիթ Գալստեան յայտնելով ՀՅԴ ծրագրային փաստաթուղթերուն մէջ ամրագրուած եւրոպական արժեքներու հաւատարմութեան իրողութիւնը, կարեւոր նկատեց Հայաստան-Եւրոպական Միութիւն համագործակցութեան հետագայ զարգացման անհրաժեշտութիւնը՝ ատիկա դիտելով իբրեւ երկրին մէջ ընկերային ու քաղաքացիական շինարարութեան կենսական հիմք, երկրին մէջ ժողովրդավարութեան խորացման ու ամրացման, արմատական փոփոխութիւններու գրաւական: Հանդիպումին ւարտին Ադուան Վարդանեան նաեւ իր գոհունակութիւնը յայտնեց Եւրոպական Միութեան յանձնակատարին Եւրանեսթի լիագումարին մասնակցելու ու Հայաստանի մէջ «Եւրոպական շաբթուան» իր կարեւոր մասնակցութիւնը բերելու համար:

## **Հայաստան – Եւրոպական Միութիւն Նոր Համաձայնագիր Կը Պատրաստուի**

Հայաստան-Եւրոպական Միութիւն համագործակցութեան շուրջ խորհրդակցութիւնները եզրափակիչ հանգրուանի մէջ են, Եւրանեսթի խորհրդարանական վեհաժողովի քաղաքական յանձնախումբի նիստին Չորեքշաբթի օր յայտարարած է Հայաստանի արտաքին գործոց նախարար Էդուարդ Նալբանդեան:

«Հայաստան պատրաստ է բոլոր ձեւաչափերով, հաւանական մարզերով եւ ուղղութիւններով շարունակել Եւրոպական Միութեան հետ համապարփակ համագործակցութիւնը՝ նկատի ունենալով մեր պարտաւորութիւնները այլ համարկման հոլովոյթներուն մէջ», ըսած է Նալբանդեան:

Եւրոպական Միութեան հետ պատրաստուող նոր համաձայնագիրը պիտի ներառէ այն մարզերը, որոնք չեն հակասեր Եւրասիական միութեան:

Եւրանեսթի խորհրդարանական վեհաժողովի համանախագահ Հէյտի Հաութալա «Ազատութիւն» ձայնասփիւռի կայանին ըսած է, որ համագործակցութիւն կարելի է մարդկային իրաւունքներու, ժողովրդավարութեան, անկախ դատական համակարգ ունենալու, ինչպէս նաեւ տնտեսական բարեփոխումներ իրականացնելու համար: «Նոր համաձայնագիրը, որ կը քննարկուի, ընկերակցման համաձայնագիր չէ, ատիկա իւրայատուկ համաձայնագիր է, որ, իմ տուեալներովս, տակաւին նոյնիսկ անուն չունի: Մենք պէտք է հասկնանք՝ ինչ բանի կարիք ունի Հայաստան: Համաձայնագիրի կնքման համար վերջնական ժամկէտ չկայ, բայց, անշուշտ պէտք է բազմապատկուած բանակցութիւններ կատարուին», ըսած է Հաութալա:

Եւրոպացի պաշտօնատարները կը յայտարարէին, որ Հայաստան պէտք է յանձնառու մնայ Եւրոպական ուղղութեան, բայց առաւելապէս դիւանագիտական բառապաշար կ'օգտագործէին: Տարբերուող էր հասարակական կազմակերպութիւններ ներկայացնող արեւելեան գործընկերութեան քաղաքացիական հասարակութեան ֆորումի ղեկավար խորհուրդի համանախագահ Քշիշթոֆ Պոպինսքիի ելոյթը: Ան քննադատած է Հայաստանի մէջ տեղի ունեցող ընտրութիւնները եւ նշած է, որ, բազմաթիւ պարագաներու դէտերը աչք փակած են խախտումներու նկատմամբ:

Հայաստանի արտաքին գործոց նախարար Էդուարդ Նալբանդեան, անդրադառնալով դարաբաղեան խնդիրին, սլովենական «Թնենիք» օրաթերթին վերջերս տուած հարցազրոյցին մէջ ըսած էր, որ Հայաստան կը նախընտրէր, որ Ռուսիա զէնք չվաճառէր Ազրպէյճանին: «Ազատութեան» հարցումին, թէ արդեօք այս մտահոգութիւնը արծարծուած է նաեւ ռուս պաշտօնատարներու հետ հանդիպումներու ատեն, եւ արդեօք արձագանգ եղած է, Նալբանդեան Չորեքշաբթի օր պատասխանած է. «Դուք անիմաստ հարցումներ կու տաք»:

### **Նախագահ Սարգսեան Ընդունեց Եւրանեսթի Խորհրդարանական Վեհաժողովի Բիւրոյի Անդամները**

Նախագահ Սերժ Սարգսեան Չորեքշաբթի օր ընդունած է Եւրանեսթի խորհրդարանական վեհաժողովի բիւրոյի անդամները, որոնք Հայաստան եկած են 16-18 Մարտին Երեւանի մէջ



տեղի ունեցող Երանեսթի չորրորդ լիազումար նիստի աշխատանքներուն մասնակցելու նպատակով:

Ըստ նախագահի պաշտօնական կայքին, Սերժ Սարգսեան յոյս յայտնած է, որ խորհրդարանական վեհաժողովի ընթացիկ լիազումար նիստը արդիւնաւէտ ըլլայ, եւ օրակարգի հարցերուն շուրջ խորհրդարանական ձեւաչափով ընթացող քննարկումներն ու ընդունուելիք բանաձեւերը նպաստեն Երոպական Միութեան եւ գործընկեր երկիրներուն միջեւ յարաբերութիւններու ամրապնդման: Սերժ Սարգսեան ընդգծած է, որ կառուցողական եւ արդիւնաւէտ քննարկումներու համար կան բոլոր նախադրեալները:



Կողմերը անդրադարձած են Հայաստան-Երոպական Միութիւն համագործակցութեան եւ յարաբերութիւններու զարգացման հեռանկարին, այդ հարցին մէջ Երանեսթի ուրոյն տեղին եւ դերին: Զրուցակիցները յոյս յայտնած են, որ երեւանեան խորհրդարանական հանդիպումները կարելոր հանգրուան կը դառնան Հայաստան-Երոպական Միութիւն յարաբերութիւններու զարգացման համար:

«Հիւրերուն խնդրանքով նախագահ Սերժ Սարգսեան անդրադարձած է Հայաստանի արտաքին քաղաքականութեան առաջնահերթութիւններուն, Երասիական տնտեսական միութեան անդամակցելու որոշման հիմքի գործօններուն, Հայաստան-Թուրքիա յարաբերութիւններուն, Լեռնային Ղարաբաղի հիմնախնդիրի խաղաղ լուծման ուղղութեամբ ԵԱՀԿ-ի Մինսքի խմբակի համանախագահ երկիրներուն հետ Հայաստանի ջանքերուն, շրջանի խնդիրներուն եւ մարտահրաւերներուն, Հայոց ցեղասպանութեան 100-ամեակին կապակցութեամբ 2015 թուականին ընթացքին Հայաստանի եւ սփիւռքի մէջ նախատեսուած ոգեկոչման ձեռնարկներուն եւ անոնց խորհուրդին: Նախագահ Սերժ Սարգսեան պատասխանած է նաեւ Երանեսթի բիրոյի անդամները հետաքրքրող հարցումներուն», կը նշէ պաշտօնական աղբիւրը:

## **Արծուիկ Մինասեան Երանեսթի Նիստին Արծարծեց Փակ Սահմաններու Խնդիրը**



Երանեսթի խորհրդարանական վեհաժողովի չորրորդ լիազումար նիստին ընթացքին իրենց նկատառումները որոշ խնդիրներու վերաբերեալ ներկայացուցած են նաեւ հայ պատգամաւորները:


Ազգային ժողովի ՀՅԴ խմբակցութեան պատգամաւոր Արծուիկ Մինասեան ներկայացուցած է փակ սահմաններու վերացման հարցը: «Կարելոր կը նկատեմ, որ Երոպա բաւարար ջանքեր գործադրէ փակ սահմաններու վերացման ուղղութեամբ: Թուրքիա եւ Ազրպէյճան արդէն 20 տարի է Հայաստանի նկատմամբ կը կիրարկեն շրջափակման քաղաքականութիւն: Հայաստան չունի ելք դէպի ծով, եւ Երոպայի հետ զայն կապող միակ սահմանը Վրաստանն է: Շատ կարելոր կը նկատեմ, որ Երոպական Միութիւնը ճնշում բանեցնէ Թուրքիոյ վրայ, որպէսզի Թուրքիա առանց նախապայմաններու բանայ սահմանները, այդ պարագային Հայաստան աւելի մեծ կարելիութիւններ կ'ունենայ համարկուելու Երոպայի հետ», ըսած է պատգամաւորը:

ԱՆՆՈՒՄԱՐ

Վայքաունթ Ճէյմս Պրայս

Առաջին անգամ Անգլիոյ մէջ հայերու կոտորածներու մասին պաշտօնական յայտարարութիւն կատարեց Վայքաունթ Ճէյմս Պրայսը, 1915-ի Հոկտեմբեր 6-ին եւ այն բնութագրեց կանխամտածուած ծրագրի գործադրում:

Բրիտանական հայասիրական շարժման ականաւոր գործիչ, իրաւաբան, պատմաբան եւ պետական գործիչ՝ Ճէյմս Պրայս, ծնած է Իրլանտայի Պելֆաստ քաղաքը 1838-ին: Ուսումը ստացած է Կլասգոյի համալսարանին եւ Օքսֆորտի Թրինիտի քոլէճին մէջ: Եղած է Անգլիոյ խորհրդարանի անդամ, դիւանապետ, ԱՄՆ-ի մէջ դեսպան, փոխնախարար եւ նախարար: Արժանացած է Լորտ տիտղոսին:



Առաջին անգամ այցելած է Արեւմտահայաստան 1876-ին եւ բարձրացած Արարատ լեռը: Հրատարակած է « Անդրկովկաս եւ Արարատ» գիրքը 1877-ին: 1878-ին կը հիմնէ առաջին անգլո-հայկական ընկերութիւնը: 1880-ին Պրայս իր երկրորդ ճամբորդութիւնը կը կատարէ Արեւմտեան Հայաստան, կ'այցելէ նաեւ Զմիռնիա եւ Կ. Պոլիս: 1893-ին կը հիմնադրէ նոր անգլո-հայկական ընկերակցութիւնը:

Հայասիրական շարժման նոր վերելքը Բրիտանիոյ մէջ կը սկսի 1894-1896 թուականներու համիտեան կոտորածներէն ետք: Պրայս բազմիցս հանդէս եկած է հայանպաստ յօդուածներով՝ անգլիական եւ ամերիկեան մամուլի մէջ: 1896-ին ան չորրորդ անգամ ըլլալով կը վերահրատարակէ իր «Անդրկովկաս եւ Արարատ» աշխատութիւնը, համալրելով այն « հայկական հարցի քսան տարիները» գլխով:

Լորտ Ճէյմս Պրայս առաջիններէն էր, որ ձայն կը բարձրացնէ Առաջին Աշխարհահամարտի տարիներուն (1914-1918) Օսմանեան կայսրութեան երիտթուրքական կառավարութեան կողմէ հայերու հանդէպ իրականացուող հայասպան քաղաքականութեան դէմ: Ան այս հարցը բազմիցս բարձրացուցած է Բրիտանիոյ խորհրդարանի ամպլիոնէն: Այդ տարիներուն Ճ. Պրայս մեծ մասնակցութիւն կ'ունենայ բրիտանա-հայկական Կարմիր խաչի եւ փախստականներու ֆոնտի ստեղծման:

**www.aztagdaily.com**

Պրայսի խնդրանքով է, որ Անգլիացի պատմաբան Արնոլտ Թոյնպի, Անգլիոյ պետական արխիւները քննելով եւ մեծ թիւով փաստաթուղթեր եւ վկայութիւններ հաւաքելով, հայ ժողովուրդի կոտորածներու պատմութիւնը կը գրէ: 1916-ին Պրայսի խմբագրութեամբ եւ ընդարձակ առաջաբանով Թոյնպիի այդ գործը՝ «Հայերու վիճակը Օսմանեան Կայսրութեան մէջ 1915-1916» փաստաթուղթերու ժողովածուն, որ յայտնի է «Կապոյտ գիրք» անունով, պատմական մեծ նշանակութիւն եւ արժէք ունի հայոց ցեղասպանութիւնը հաստատող եւ ցեղասպանութեան ուսումնասիրութեան կարեւորագոյն սկզբնաղբիւր է: Գիրքին մէջ ներկայացուած են փաստաթուղթեր՝ թիւով 158, որոնք հիմնականին մէջ չէզոք երկիրներու եւ գերմանացի ականատեսներու վկայութիւններ են հայերու տեղահանութեան եւ կոտորածներու վերաբերեալ (կապոյտ կոչուած է կազմին պատճառով):

1918-ին Լորտ Պրայս կը տպագրէ «Հայաստանի ապագան» յօդուածը: Ան կ'անդրադառնայ 1894-1896 թուականներու համիտեան կոտորածներուն, Ատանայի 1909 թուականի կոտորածին եւ 1915 թուականի հայոց զանգուածային ջարդերուն եւ տարագրութեան:

Պրայսը խստօրէն դատապարտած է նաեւ երիտթուրքերուն յաջորդած քեմալականներու վարած քաղաքականութիւնը: 1920 թուականի Փետրուար ամսուն, Անգլիոյ Լորտերու պալատին մէջ իր ելոյթի ժամանակ մեղադրած է քեմալականներուն՝ Կիլիկիոյ հայերու հանդէպ նոր կոտորածներ սանձելու համար:

Լորտ Ճէյմս Պրայս կը մահանայ 22 Յունուար 1922 –ին, մինչեւ վերջ պայքարելով հայ ժողովուրդի տառապանքները թեթեւցնելու համար:

Եղեռնի Յուշապատին վրայ եւ հայ ժողովուրդի սրտերուն մէջ յաւերժացած է մեծ մարդու անունը՝ «Ճէյմս Պրայս 1838- 1922»:

*Պատրաստեց Քուէթի Ազգային Վարժարանի  
տնօրէն Մանուկ Մանուկեան*

***Դու մի անյայտ Բանաստեղծ ես՝ չտեսնուած մինչ էսօր,  
Առանց խօսքի երգ ես թափում հայեացքներով լուսաւոր:  
Ես էլ, ասենք, զարմանալի Ընթերցող եմ բախտաւոր,  
Որ կարդում եմ էդ երգերը էսքան հեշտ ու էսքան խոր:***

*Յովհաննէս Թումանեան*

**ԼՈՒՐԵՐ ԳԱՂՈՒԹՆԵՐԷՆ**

**Հայոց Ցեղասպանության Չոհերու Յիշատակը  
Յուշարձանող Յուշարձան Իրանի Մէջ**



Իրանի հայ համայնքներէն մէկուն՝ Ռաշթ քաղաքի հայկական եկեղեցւոյ բակին մէջ տեղադրուած է Հայոց ցեղասպանութեան Չոհերու յիշատակը յուշարձանող յուշարձան:

Յուշարձանը ունի 1915 սմ. բարձրութիւն, որ կը խորհրդանշէ 1915 թուականը: Անիկա կը խորհրդանշէ աշխարհասփիւռ հայութիւնը:

**Կոմիտասին Նուիրուած Երեկոյ  
Յունաստանի Մէջ**



Հայոց ցեղասպանութեան 100-ամեակին նուիրուած ձեռնարկներու ծիրին մէջ Քսանթիի հայ գաղութը կազմակերպեց իր առաջին ձեռնարկը՝ ձօնուած Կոմիտասին: Ձեռնարկը տեղի ունեցաւ ուրբաթ, 6 Մարտին: Ներկայ էին շրջանի հոգեւոր հովիւ Պարետ քնյ. Խաչերեան, Ազգային վարչութեան ներկայացուցիչը, ՀՅԴ Կ. կոմիտէի ներկայացուցիչ Ատրիկ Ստեփանեան, տեղական կառոյցներու ներկայացուցիչներ. եկած էին նաեւ դրացի քաղաքներէն եւ բազմաթիւ յոյներ ու հայեր:

Բացումը կատարեց Մարալ Պետրոսեան՝ փոքր ներածական մը ընելով Ցեղասպանութեան շուրջ եւ անդրադառնալով 100-ամեակի նշանակութեան: Ապա ան հրաւիրեց երգչուհի Հռիփսիմէ Դանիէլեանը, որ ընկերակցութեամբ Լարա Քելեսիտուի (դաշնակ) եւ Մարինա Փալուի (ջութակ), ներկայացուց 13 ծանօթ երգեր, ինչպէս՝ «Կռունկ», «Օհրանի ծառ»ը, «Քելէ-քելէ», «Անտունի», «Հով արեք»ը, եւ այլն:

Ձեռնարկը փակուեցաւ «Հայաստան» երգով՝ երգչուհիին եւ Քսանթիի քաղաքապետական երաժշտանոցի երկսեռ երգչախումբին մասնակցութեամբ:

**Ցեղասպանութեան 100-Ամեակի Նուիրուած  
Աննա Մայիլեանին Համերգը**

Փարիզի մէջ, հայ գիրքի ցուցահանդէս-վաճառքի ծիրին մէջ, 3 Մարտին տեղի ունեցաւ Հայոց ցեղասպանութեան 100-ամեակին նուիրուած համերգ մը՝ կազմակերպութեամբ Ալֆորվիլի Հայ մշակոյթի տան՝ գլխաւոր մասնակցութեամբ փարիզեան շրջանի «Նայիրի» հնգեակին, ղեկավարութեամբ Հայկ Դաւթեանի եւ մեցցո-սոփրանօ Աննա Մայիլեանի:

## Յեղասպանության 100-ամեակին Առիթով Հոգեհանգիստ, Յուշակոթողի Բացում Եւ Ծառատնկում



Յեղասպանության 100-ամեակին նուիրուած ձեռնարկներու ծիրին մէջ, 12 Մարտին «Արարատ տուն»-ի Միշըն Հիլզի համալիրին մէջ, տեղի ունեցաւ արարողութիւն, որպէսզի տարեց սերունդի ներկայացուցիչները մասնակից դառնան մեր նահատակներուն մատուցուած յարգանքին եւ պահանջատիրութեան վերահաստատման:

հոգեհանգստեան արարողութիւն: Աւարտին, մէկ վայրկեան լռութեամբ յարգուեցաւ նահատակներուն յիշատակը, ապա յատուկ աղօթք տեղի ունեցաւ մատրան մէջ տեղադրուած նահատակաց աճիւններուն մօտ:

Մատրան մէջ տեղի ունեցաւ

Այնուհետեւ, տեղի ունեցաւ նոր կանգնած յուշակոթողին բացում, որուն յաջորդեց տարեցներու ձեռամբ ծառատնկում՝ համալիրի պարտեզին մէջ, իբրեւ խորհրդանիշ աւանդի փոխանցման եւ մեր ժողովուրդի վերածաղկումին:

## «Շնորհակալ Ենք, Ամերիկա՛» Ցուցահանդէսի Բացում



Հովանաւորութեամբ Լոս Անճելըսի քաղաքապետ Էրիք Կարսէթի եւ քաղաքապետարանի խորհուրդի անդամ Փոլ Գրիգորեանի, 6 Մարտին Լոս Անճելըսի Հանրային գրադարանին մէջ տեղի ունեցաւ բացում Հայոց ցեղասպանութեան 100-ամեակին նուիրուած ցուցահանդէսին: Հայ դատի «Շնորհակալ Ենք, Ամերիկա՛»

յանձնախումբին կազմակերպած ցուցահանդէսը երկու ամիս բաց պիտի ըլլայ գրադարան այցելողներուն առջեւ, ապա նահանգի այլ գրադարաններուն մէջ պիտի ցուցադրուի տարուան ընթացքին:

Ցուցահանդէսին նպատակը, Յեղասպանութեան նահատակները ոգեկոչելու կողքին, երախտագիտութեան արտայայտութիւն մըն է «Նիր իսթ ոլիֆ» կազմակերպութեան, որ Յեղասպանութեան ու յաջորդող տարիներուն, 1915-1930, մեծ նպաստ տրամադրած էր Յեղասպանութենէն վերապրած որբերուն:

## Առաջնորդ Մարտիրոսեան Դասախօսեց Ցեղասպանութեան Նահատակներու Սրբադասութեան Մասին



Ընդառաջելով Քրեեսենթա Հովիտի Հայց. Առաքելական Ս. եկեղեցոյ հոգևոր հովիւին եւ հոգաբարձութեան հրաւերին, 22 փետրուարին առաջնորդ Մուշեղ արք. Մարտիրոսեան հանդիսապետեց Ս. պատարագին, եւ փոխանցեց իր պատգամը: Ան հակիրճ կերպով անդրադարձաւ Մեծ պահքի կիրակիներուն, անոնցմէ իւրաքանչիւրի իմաստին եւ հոգևոր պատգամին:

Աւարտին, «Տիգրան եւ Զարուհի Տէր Ղազարեան» սրահին մէջ սրբազան հայրը, որպէս սրբադասման յանձնախումբի անդամ, տեղեկութիւններ փոխանցեց ներկաներուն Հայոց ցեղասպանութեան նահատակներու սրբադասման հարցին մասին: Ան կարճ բացատրական ընթերցումով մը ցոյց տուաւ, որ սրբադասման հարցը, ազգային եւ եկեղեցական տեսանկիւններէն դիտուած, դարձած էր հրամայական: Ան նկատել տուաւ, որ սրբադասման յանձնախումբը, երկար խորհրդակցութիւններէ ետք, որդեգրած է մեր նահատակները հաւաքական սրբադասութեան արժանացնելու որոշումը, անելցնելով, որ յանձնախումբը մշակած է նաեւ այս մասին հոշակագիրը, վկայաբանութիւնն ու արարողակարգը, որոնք ներկայացուած են Եպիսկոպոսաց ժողովին եւ՝ որդեգրուած: Առ այդ, յառաջիկայ 23 Ապրիլին պիտի կատարուի նահատակներու հաւաքական սրբադասումը:

Առաջնորդ սրբազանը անդրադարձաւ նաեւ մեր եկեղեցոյ կողմէ սրբադասման համար անհրաժեշտ նկատուող հիմնական պայմաններուն:

### 100- Ամեակի Ծիրին Մէջ՝ Ցուցահանդէս

Մարտ 10-ին Լիոնի մէջ «Յիշատակ եւ արդարութիւն» խորագրով սկիզբ առաւ Հայոց ցեղասպանութեան 100-ամեակին նուիրուած ձեռնարկներու շարքը: Արդարեւ, «Պիլլիքեան» հիմնադրամի սրահին մէջ տեղի ունեցաւ լուսանկարիչ Խաժակ Օհանեանի «Հալէպ 1915...» ցուցահանդէսի բացումը հովանաւորութեամբ Լիոն քաղաքի քաղաքապետարանին, աջակցութեամբ Հայաստանի աւագ հիւպատոսութեան եւ կազմակերպութեամբ Լիոնի քաղաքային գրադարանին, «Պիլլիքեան» հիմնադրամին եւ Տեսինի Հայ յուշագրութեան ազգային կեդրոնին:

Ցուցահանդէսի բացման ողջոյնի խօսքով հանդէս եկան Լիոնի առաջին փոխքաղաքապետ Ժորժ Քեփենեկեան, Լիոնի պատմական ժառանգութեան, յիշողութեան եւ նախկին ռազմիկներու հարցերու փոխքաղաքապետ Ժան-Տոմինիք Տիրան, «Պիլլիքեան» հիմնադրամի նախագահ Ժան-Փիլեո Գլաւրբան, Հայ յուշագրութեան ազգային կեդրոնի նախագահ Ժիլ Մարտիրոսեան:

Ցեղասպանութենէն վերապրած իր հօր պատմութեամբ ոգեշնչուած լիոնահայ լուսանկարիչին աշխատանքները կը պատկերեն Հալէպը՝ միաժամանակ ներկայացնելով տարբեր փիլիսոփաներու եւ պատմաբաններու միտքեր: Ցուցահանդէսը բաց պիտի մնայ մինչեւ մայիս 16:

## Պերկամոյի Սուրբ Աննայի Տաճարին Մէջ Յիշատակուած Են Հայոց Ցեղասպանութեան Զոհերը


Իտալական Պերկամոյի Սուրբ Աննայի տաճարին մէջ յիշատակուած է 1915 թուականի Հայոց ցեղասպանութեան զոհերը: Այս մասին գրած է տեղական «Լ'էքօ տը Պերկամօ» պարբերականը:

«Առայժմ Հայոց ցեղասպանութիւնը ճանչցած են 20 պետութիւններ, որոնց կարգին՝ Իտալիան», գրած է պարբերականը:

«Մենք մեծապէս զգացուած ենք, որ նաեւ բազմաթիւ իտալացիներ հաւաքուած են հոս՝ մեզի հետ միասնաբար յարգելու Հայոց ցեղասպանութեան զոհերուն յիշատակը», ըսած է արարողութեան մասնակից հայերէն մէկը:



## «Արմէն Լիվր»-ի Գիրքերու 10-րդ Տօնավաճառին Բացումը



Մարտ 3-ին Ալֆորվիլի «Փոլ քիւլթիւրել» սրահին մէջ կատարուեցաւ բացումը «Արմէն Լիվր»-ի գիրքերու 10-րդ տօնավաճառին: Բացման խօսք արտասանեցին Յասմիկ Գեւորեան եւ Արշալոյս Սարգիսեան, որոնցմէ ետք պատմաբան Ծովինար Գեւորեան անդրադարձաւ տօնավաճառի գործունէութեան: Այնուհետեւ խօսք առին Ալֆորվիլի յաջորդական քաղաքապետներ՝ Ռընէ Ռուքէ եւ Լիւք

Քարվունաս, որմէ ետք կարդացուեցաւ Անահիտ Տէր Մինասեանին նամակը, որ անցնող ինը տարիներուն ընթացքին հանդիսացած է «Արմէն Լիվր»-ի «կնքամայրը»:

Այս տարուան գիրքերու տօնավաճառը ղեկտնմբեր ամիսէն տեղափոխուեցաւ Մարտ ամիս՝ յատուկ կերպով նշելու համար Ցեղասպանութեան 100-ամեակը:

Շուրջ 6000 գիրքերու ցուցադրութեան կողքին, կազմակերպուած էր նաեւ նկարիչ Ժան-Փիեռ Սեֆերեանի «Անապատ» խորագիրով փորագրութիւններու ցուցահանդէսը: Ցուցադրուած են նաեւ 24 Ապրիլ 1915-ի նահատակ գրող-մտաւորականներու լուսանկարներ, որոնք Հրանդ Տինք հիմնարկին կողմէ տրամադրուած էին Հայ մշակոյթի տան:

**WWW.ARMENIANPRELACYKW.ORG**

**ԿՆՈՋԱԿԱՆ**

## **Ամիսը Անգամ Մը Մարմինը Մաքրենք Թոյներէն**

Իրաքանչիւր մարդ, առողջ, թէ հիւանդ, պէտք է առնուած ամիսը անգամ մը մարմինը մաքրէ թոյներէն: Մարմինը մաքրելու բազմաթիւ ձեւեր կան. կը ներկայացնենք այն մէկը, որ հիմնուած է խնձորի վրայ:

Շատ կարեւոր է մարմինը ներսէն մաքրելը, քանի որ անընդհատ անորակ սնունդ ստանալով՝ մենք վնասակար մնացորդներ կը հաւաքենք մարսողական անցքերուն մէջ, ուրկէ անոնք կը տարածուին եւ կը վնասեն մարմինը:

Խնձորին մէջ առկայ փեքթինը դրական ազդեցութիւն կը գործէ մարսողական համակարգին վրայ եւ կը մաքրէ վնասակար մասնիկներէն:

Ահա թէ ինչպէ՛ս կարելի է ամիսը անգամ մը մարմինը մաքրել թունաւոր նիւթերէն:

### **Նախաճաշ**

Առաւօտեան մէկ բաժակ խնձորի թարմ հիւթին աւելցնել կէս կիտրոնի հիւթ եւ ումպ-ումպ խմել: Երկու-երեք ժամ ետք երկու խնձոր ուտել՝ կեղելով:



### **Ճաշ**

Ճաշի ժամուն խնձորի կեղելով պատրաստուած թէյ խմել՝ 2 ճաշի դգալ մեղրով: Մէկ-երկու ժամ ետք 2-4 խնձոր ուտել եւ բաժակ մը հիւթ խմել:

### **Ընթրիք**



Ընթրիքին տաք խիւսին աւելցնել երկու թէյի դգալ մեղր եւ ուտել:

Մարմինը ներսէն մաքրելու օրը պէտք չէ օգտագործել որեւէ այլ տեսակի ուտելիք կամ ըմպելիք՝ բացի նշուածներէն:

Խնձորը դիւրին մարսուող ուտելիքներէն մէկն է: Եթէ կանոնաւոր կերպով մաքրենք մեր մարմինը այս միջոցով, կը լրացնենք մեր մարսողական համակարգը: Այս միջոցը թելադրելի է բոլորին, կապ չունի առողջ թէ հիւանդ ըլլալու հետ: Անիկա կը մաքրէ եւ կը կարգաւորէ մարսողութիւնը, արիւնը եւ ներքին գործարանները: Նաեւ օգտակար է յօդացաւէ, արթրիտէ, լեարդի եւ երիկամի հարցերէ տառապողներուն:

Վերջապէս, խնձորի այս մեթոտը դրական ազդեցութիւն կ'ունենայ ջղային համակարգին վրայ, կը բարելաւէ նիւթափոխականութիւնը եւ կ'օգնէ ձերբազատուելու աւելորդ քիլոններէն: